

dense obtectis, superne in parte non concreta foliaceis. Corolla campanulata breviter 5-dentata: dentibus inflexis conniventibus. Stylus ad nodum incrassatus antheræque basi nudæ inclusæ. Achænia *marginalia* plurima dorso cum involucre arcte connata, lateribus tuberculatis intus in alam expansis, apice in rostrum incurvatum abrupte abeuntia; *intima* 5. 6. oblonga, compressa, intus vix alata in rostrum ipsis longius falcatum sensim desinentia. Pappus brevis coroniformis quinquedentatus.—Genus hoc valde singulare in tribu *Cynarearum* subtribum proprium inter *Calendulaceas* et *Arctotideas* ponendum, omni jure constituit.

*Acanthocephalus amplexifolius* Kar. et Kir.

Herba annua, simplex aut ramosa, glaberrima. Folia amplexicaulia oblonga grosse dentata, auriculis acutis. Pedunculi axillares, breves, monocephali, apice fistulosi. Aculei involucri deflexi. Corollæ minutæ, videntur ochroleucæ. Achænia exteriora illis *Chrysanthemi Roxburghii* subsimilia, interiora fructus *Clematidum* æmulant, at omnia glaberrima.

Hab. in herbidis montium Arganaty Songoriæ, inter Iluv. Ajagus et Lepsa. Sub medium Junii mensis legimus plerumque defloratum. ☉.

Krasnoyarsk.

d. 28 Decembris 1841.